

萬曆
泉州府志

第三册
五至六卷

泉州府志卷五

規制志下

學校

泉州府學五季以前在崇陽門外宋太平興國初
守喬維岳始遷今地七年守孫逢吉即廟建學祥
符二年守高惠連遷于育材坊紹興七年守劉子
羽復建之左學右廟增舊基高二尺餘廟之中爲
先師殿前爲東西廡學之中爲明倫堂後爲議道
堂明倫堂前爲東西齋殿堂之南各有方池池前
爲藏書閣廨宇庖廩之屬悉備又贖東門舊地闢

門西向門內鑿河浚池伐石爲橋以通巽流嘉泰
改元守倪思作櫺星門嘉定四年守鄒應龍即明
倫堂議道堂間建六經閣紹定改元教授鄭璜立
先賢祠于廟東咸淳改元攝晉江令鍾國秀重蓋
廟殿增舊基高二尺兩廡拓如之咸淳中殿燬守
道希佑重建元至治元年總管廉忱始甃臺壠兩
廡從祀像築杏壇于櫺星門南至順間總管怯來
復飾聖賢從祀像九年郡判盧僧孺以廟學前阻
於方池伐石橋之十年監郡偰王立重建明倫堂
修議道堂及兩廡先賢祠洪武八年守張頴倡郡

之好義曰何大榮者由廟及學修葺一新三十一
年殿圮守胡器重建永樂初教授彭九思勸民助
貲葺兩廡建橋星門宣德中僉事魯穆修方池兩
橋護以石欄正統十一年僉事陳祚以明倫堂地
卑築高三尺改議道堂爲至善堂建會饌堂堂北
建米廩設神厨宰牲所于戟門西南疏河道通潮
汐于方池天順二年守張嵒以學門西向非宜建
廟門南向出入由之後提學僉事游明復命同知
孔惠建學門於廟門左以便往來并建號房二十
門成化十七年大水東廡壞守陳勉修之明年葺

禮殿明倫堂。堂後建穿堂。又建會講堂于戟門左。右建祭器庫。增建號房二十間。祭酒蔡清爲記。弘治十七年同知于茂即西廡後地建號房六前有池甃石爲臺。蓋亭其上。命曰觀瀾。正德十五年守葛恒繪飾廟殿及聖賢從祀像。立題名碑于明倫堂。尚書林俊爲記。教官舊各有解歲遠傾圮。多居號舍。嘉靖三年守高燧乃以至善堂爲教授廳。建訓導屬齋。廟前地南臨城河。廣其半爲泮池。浚以通潮汐。易河南民居。闢路以通。淮大衛嘉靖十二年守俞咨伯重建明倫堂。造泮池橋。舊禮殿。

前有夫子泉并久堙訪濬之立碑其上表河橋曰
洙泗三十二年守熊汝達建尊經閣於明倫堂東
四十五年守萬慶建育英門修志道據德依仁游
藝齋啓聖公祠在明倫堂尊經閣東金修之名宦
鄉贊二祠舊在禮殿東明倫堂西改建于明倫堂
左尊經閣右射圃在尊經閣東北撤而重建之前
扁坊曰觀德中扁堂曰揖遜高風具射禮器師生
以時講習其中隆慶四年守朱炳如請特祀理學
名臣蔡文莊先生清建祠于廟殿右之西南萬曆
五年守姚光泮請特祀提學僉事陳先生琛建祠

于育英門左十年改建敬一箴亭爲教授解移亭于明倫堂右萬曆二十八年守寶子尙重修尊經閣請特祀按察使蘇公濬建祠于尊經閣前三十七年地久震殿堂之兩廡壞守姜志禮葺之四年奉文改泮池爲園以合古類宮之制

晉江縣學宋紹興間附于郡學淳熙四年知縣林輿請建大成殿于行春門內砌兩廡飾聖賢像咸淳中知縣趙璇建明倫堂元元貞中尹劉潤建櫺星門洪武初改爲郡治乃於行春門外舊泉山書院建學左廟右學殿廡齋堂悉仍書院舊永樂

中訓導詹景威等率好義者建禮殿戟門正統五年購民地建櫺星門十年僉事陳祚守曾宏修殿廡戟門櫺星門天順二年守張嵩以明倫堂後迫民居買地廣之建尊經閣前爲方庭翼以兩廊學門舊在櫺星門左後遷右守徐源復于左十八年守陳勉於學門左築牆一十六丈旁開一徑以隔民居弘治十七年同知于茂鬻文公祠民地建號房二間正德十二年守葛恒重新十五年葺尊經閣前兩廡爲教諭廳訓道廳二所一在西齋後一在米廩南今廢爲省牲所殿門前二坊左曰贊關

右曰聖域折南爲外門嘉靖九年建敬一亭于學門北十五年建啓聖祠于殿後射圃在殿東即梁文靖公故宅也西南偏地深十餘丈廣八丈餘乃蔡文莊先生地地有荔枝八株弘治間持券送入于學萬曆三十年教諭婁拱北建坊于明倫堂儀門外三十三年訓導蔡逢春修大成殿重簷而高之三十六年僉事陳治本知縣李待問修明倫堂戟門櫺星門

南安縣學在縣城東二里黃龍溪左舊建于縣治西紹興中知縣劉孔修移建今所寶慶元年知縣

毛淮病其卑隘增高之元統二年建殿廡戟門櫺
星門殿左爲遵道堂右爲明倫堂至正十四年燬
十七年移廟于縣治二十二年攝學錄周異觀請
還建舊所二十五年修廟殿戟門明倫堂翼以兩
齋洪武永樂間知縣羅安余慶修齋舍儀門宣德
二年教諭包原明建櫺星門修射圃立觀德亭于
學左廣泮池射圃六年撤殿廡而新之成化十八
年知縣陳廷忠白提學僉事任彥常買民田二畝
於學左墳築堂齋弘治二年知縣黃濟建饌堂修
櫺星門明倫堂豎左右二坊左曰義路右曰禮門

十一年知縣沈誠建齋宿所于明倫堂西嘉靖三十
年知縣顏容端重修九年建敬一亭十五年建啓
聖祠二十八年知縣唐愛鑿泮池建石橋于左復
左右建應奎毓秀二坊立文昌台甲二臺三十七
年倭寇侵壞知縣夏汝礪建三寓館于邑城爲學
官舍二在城隍廟左一在城隍廟右寇平仍移舊
廨知縣甘重修葺之隆慶元年署縣同知丁一
中建亭于石橋南畔扁曰見龍萬曆三十四年地
大震儀門折戟門外二石坊圯知縣周紹祚重修
之

同安縣學在縣治東南隅登龍坊五季末令陳洪
濟建宋建隆二年知縣林滂遷東南紹興十年定
建今所左學右廟二十三年主簿朱熹建尊經閣
于大成殿後建教思堂于明倫堂左作講堂又集
官書貯之嘉定間知縣毛當時建號房于明倫堂
左右洪武二年知縣呂復重建正統九年僉事陳
祚重修天順五年縣丞劉珣器建明倫堂兩齋戟
門櫺星門改尊經閣於明倫堂後逾年學門戟門
被風圮復修之成化十一年知縣張遂重建教思
堂弘治十八年縣丞張啓建號房正德十五年知

楊林

縣趙汝弼新明倫堂兩齋即學東隙地建文公祠
嘉靖年教諭陸佶修櫺星門米廩廡舍三年提
學副使邵銳命新尊經閣九年建敬一亭于廟前
右十三年建啓聖祠于廟北二十八年堂壞通判
吳徵修之前爲泮池後爲名宦鄉賢祠文廟右北
爲教諭廨東西爲訓導廨射圃在明倫堂西成化
庚寅督學副使游明判復其地四之一壬辰推官
柯漢買民地拓之知縣張遂建觀德亭後圮隆慶
元年知縣鄧一相重建

惠安縣學宋始立在邑西乾興初知縣李畋作先

聖像及十哲于堂繪從祀諸賢于東西廡熙寧初遷于皇華驛左後六十年知縣彭元達復遷還舊地淳熙九年令蔡易遷登科山之陽元至元初縣尹趙仲臣始建于縣左即今學拓大成殿修明倫堂堂之後曰尊經閣下爲崇賢堂繚以周垣徙光霽亭其中自櫺星門達通衢翼以石闌未幾燬于寇攝學事孔希文主簿王斌復修未及竣元亡洪武四年知縣羅泰作明倫堂於殿後旁列二齋左曰守中右曰育材前有杏壇二十九年知縣馮靖作饌堂於月倫堂後永樂四年知縣陳永年新殿

庭先櫺星門次戟門內作泮池修兩廡以及堂宣
德六年知縣高顯建饌堂及守中育材二齋八年
僉事曾穆移泮池於戟門外正統元年重建大成
殿明倫堂十一年僉事陳祚修飾廟殿易守中齋
爲興賢成化十九年知縣張桓以明倫堂隱殿後
擇空西高爽地易之弘治五年知縣虞坤即堂北
建尊經閣十五年同知于茂開拓泮池正德六年
提學副使楊子器易兩齋左曰居仁右曰由義嘉
靖三年知縣萬夔以廟殿斜當文筆峰改正之先
作大成殿兩廡戟門櫺星門次作明倫堂堂後爲

教諭廨易舊尊經閣爲饌堂各南向又南爲鄉賢
名宦祠于學門出入之路路東轉北爲倉庫南北
爲二訓導廨省牲所在櫺星門右撤舊基新之九
年知縣莫尚簡作射圃於朝天門外之邑厲壇中
建觀德堂拓東西二序及兩廊石砌侯道長如其
步之制繕以周垣學校之規制始備是年改名宦
鄉賢二祠建敬一亭十五年知縣丘民仰改藏書
庫爲啓聖祠祠左名宦右鄉賢

安溪縣學在縣治東南宋咸平四年建于縣治西
南宣和六年遷縣治東紹興十二年知縣楊幹始

定今所元至正十四年燬于兵洪武六年郡人蔣宗禧倡義重建十四年知縣侯士舉成之前廟後學正統十二年僉事陳祚建廟廡戟門櫺星門遷明倫堂兩齋于殿西建饌堂于殿東建米廩於明倫堂後成化初提學游明徙櫺星門於戟門前正德六年知縣王廷佐修明倫堂建神庫神厨宰牲房于禮殿東北舊先賢祠在殿西學門在櫺星門左十六年知縣龔頴徙學門于儀門前改建先賢祠于櫺星門外教官廨在明倫堂左學左瀕溪善崩嘉靖二十四年知府程秀民知縣王漸造移于